



Hr. Anthon Frederiksen
Inatsisartuni ilaasortaq

§ 37-mut apeqqut nr. 009-mut uuliamut akinut tunngatillugu akissut

Inatsisartut suleriaasianni § 37, imm. 1 naapertorlugu uuliap akianut tunngatillugu Naalakkersuisunut apeqqut saqqummiussimavat. Apeqqut suliaasaqarfigisanni akineqartussanngorlugu innersuussutaasimavoq.

1. Nunarsuarmi uuliap akia appangaatsiarujussuaraluartoq sooq nunatsinni uuliap akia appartinneqanngila?

Akissut:

Aallarniutigalugu sianigeqqussavara Naalakkersuisut imatut uuliap akianik aalajangiisannngimmata. Tamanna KNI A/S Polaroilip aalajangertarpaa.

Polaroilip uuliasinermi akigititai kingullermik 1.12.2014-imi allanngortinneqartut, akit 3,6 %-imik appartinneqarlutik KNI A/S Polaroilip nittartakkamini ilisimatitsissutigaa. Taamaalilluni KNI A/S annikitsumik 2014-imi decembarip qaammataani akinik apparsaanermik ingerlassaqarsinnaasimavoq.

Akinik apparsaanerup nunarsuarmi niuerfimmi uuliamut atugassiaanngitsumut akuiaaffimmilu akiusartut 2014-imi juunilli qaammataani appariarsimaneramik patsiseqanngitsoq KNI A/S Polaroilip ilisimatitsissutigaa.

2014-imi uuliamut atugassiaanngitsuut akuiaaffimmilu akiusartuni pisiortornerminut KNI A/S Polaroilip aalajangersimasumik akigititalinnik isumaqatigiissuteqarsimavoq. Aalajangersimasumik akigititalinnik isumaqatigiissutit atornerinut tunngaviusoq tassavoq Kalaallit Nunaanni atuisartut inuussutissarsiorfiillu sapinngisamik pitsaanerpaamik pilersaarusiornissaminut tunngavissaqartinnissaannik kissaatigisaq.

Aalajangersimasunik akigititanik isumaqatigiissutit piffissami 2008-2013-imi, KNI A/S Polaroilip naliliinera malillugu inuiaqatigiit tamaat isigalugu 197 mio. kroninik sipaagaqartissimavaat. Taamaattorli 2009 kisiat isigissagaanni aalajangersimasunik akigititat nunarsuarmi niuerfiusumi piviusutut akimut naleqqiullugu qaffasinnerusimapput. Tamanna aamma 2014-imi pivoq, nunarsuarmi niuerfiusumi akit appariarujussuarnerannik kisimi tunngaveqartumik. KNI A/S Polaroilip aalajangersimasunik akigititanik isumaqatigiissutaanni piffissami 2008-2014-imi inuiaqatigiinnut tamakkiisumik sipaarutaasoq ingerlatseqatigiiffiup 2014-imi novembarip qaammataani naliliineratigut 185 mio. kr.-t missaanniissaneragaavoq.

1.12.2014-imi pisimasutut akinik appartitsinerminut tunngaviusoq tassaasimavoq ikummatissamik akiliutaasartumi amerikamiut dollariisa nalingat 2014-imi aggustip qaammataani akinik qaffaanermut tunngaviusunut naleqqiullugu malunnartumik

06.februar 2015
Sagsnr. 2015-110498
Dok. Nr. 1836105

Postboks 1601
3900 Nuuk
Tlf. (+299) 34 50 00
Fax (+299) 32 56 00
E-mail: isiin@nanoq.gl
www.naalakkersuisut.gl

nalikinnerusumanera. Tamatuma saniatigut ingerlatseqatigiiffiup ilisimatitsissutigaa tamakkiisutut suliaqarfinnut aningaasartuutit sipaaruteqarfiunissaat iluatsissimasoq, tassalu ingerlatsinermut sulisorisanullu aningaasartuutini, tamannalu ilutigalugu naatsorsuutigisanut naleqqiullugu atortuutinik attartortitsinerit annertunerulaartumik isertitaqarfiusimapput, ingerlatseqatigiiffik ilisimatitsivoq.

Siunissamut tunngatillugu qanoq ililluni sapinngisamik pitsaanerpaamik atuisunut akit qulakkeernissaannik Naalakkersuisut KNI peqatigalugu naliliiuartassaaq.

Inussiarnersumik inuulluaqqusillunga


Vittus Qujaukitsoq